

*Aruba Scholarship Foundation:***Otro Posibilidad pa estudiantenan di Aruba**

ORANJESTAD(AAN)- Sector particular di Aruba a bin cu e iniciativa di funda un "Aruba Scholarship Foundation" pa crea fondonan necesario pa yuda muchanan Arubano cu kier bay studia na Merca. E fundacion aki ta den cuadro cu Florida Latin America/Caribbean Scholarship Program.

E programa aki ta duna gobierno di Aruba e oportunidad pa manda 3 becado y ta cuminsa desde Januari. pero e programa ta exigi cu sector priva mester crea fondonan pa "match" cu nan fondonan.

Den e fundacion cual a worde lanta ariba iniciativa di Burger King, tin como miembro Sr. Hans Schnog di Toyota, Sr.



Brian James di Aruba Bank, Sr. Eduardo de Veer di Meta corporation, Sr. Tito de Cuba di

FTA, Eric d'Arnault di Topcar y Sra. Alice van Romondt. Na e ocasion aki Minister di

Enseñanza, sr. Mito Croes, a ricibi e miembronan di e fundacion nobo y a splica cu gobierno ta tratando di haya varios beca di otro paisnan especialmente di Merca. Minister Croes a aplaudi e iniciativa particular pa yega na fondonan necesario pa e hobennan por participa den e programa di Florida.

Minister Croes a expresa di ta spera cu mas empresanan priva

lo contribui na e Aruba Scholarship Foundation. E cuenta bancario ta na Aruba Bank nr. 12780.3, y pa mas informacion por tuma contacto cu cualkier un di e miembronan di Aruba Scholarship Foundation.

Pronto lo sali un aviso anunciando na estudiantenan un que otro relaciona cu e becanan pa Florida. E programa di Florida no ta inclui estudionan pa Masters Degree.

Misa di despedida pa Pastoor Fick*Despues di a trata 13 aña na Savaneta*

ORANJESTAD(AAN)- For di principio di e siglo ak, den luna di September 1900, e Parokia di Savaneta a keda oficialmente funda pa un Pader di Orden di Dominicanonan en cooperacion cu Obispo di e tempo ey. Durante curso di añanan, te awor, 88 aña despues, e Orden di Dominicanonan a percura pa e parokia aki, cu a keda dedica na honor di Sagrado Curazon di Hesus.

Pastooran a bini y pastooran a bay, pero e parokia tey keto bay, awor cargando e frutonan di e labor spiritual y pastoral di cada uno di e pastooran cu a biba na Savaneta.

Iglesia Catolica na e parokia aki a crece y un 28 pa 30 aña pasa un misa nobo a keda traha door di Pastoor J. Standenmeyer q.e.p.d. y Mgr. Holtermann.

E aña aki, pueblo di Pos Chikito y henter parokia por a celebra na un manera sumamente solemne e bendicionamento y apertura di un Capilla di Sta. Famia, na Pos Chikito, fruto di e pueblo mes, en cooperacion cu Pastoor Fick y Mgr. Ellis.

Awor, ariba 1 di October, e parokia aki lo ricibi un di e cambionan mas grandi di su existencia. Padernan di orden di San Dominico a mengua, no tin mas cu ta bini di exterior, esunnan cu ta tin a bira di edad caba y asina nan no por keda cumpli cu e tarea spiritual cu ta concedi na nan encargo pa medio di nan vocacion.

Dia promer di October, oficialmente e Parokia di Savaneta lo keda entrega na Mgr. Ellis, como nos Obispo, y for di e dia aki Mgr. Ellis ta esun responsable pa un Pastoor den e Parokia aki. Tur asuntonan a keda regla den un ambiente bon y comprensivo.

A keda dicidi pa un cambio, y e cambio aki ta cuminsa 1 October. pader Bruno Fick,, despues di a traha na Savaneta pa 13 aña, 1 luna y 19 dia, y despues di mas cu 44 aña di un bida sacerdotal, ta bay baha cu pensioen. E lo bay biba na Curacao, no leu pa asina un contacto por keda existi.

Na su lugar como Pastoor di Savaneta, Mgr. Ellis a apunta Pader Rene Villamora, un Filipino cu ta trahando ya 4 aña na Curacao. Pader Rene lo keda instala oficialmente como P pastoor ariba Diasabra, 1 di October pa 7'or p.m. durante un Santo Sacrificio di Misa Pontifical na Savaneta.

Ariba Diadomingo 25 di September lo tin un celebracion di despedida pa Pastoor Fick, un persona masha stima pa su parokianonan. E celebracion ta cuminsa cu un Sto. Sacrificio di Misa di gradicimiento y alavez pa pidi bendicion di Dios pa Pastoor Fick por disfruta hopi aña mas di su merecido pensioen.

Despues di e celebracion Eucharistico aki, lo tin un celebracion cultural den Centro di Bario Savaneta pa henter parokia y pa tur esnan cu ta desea di tuma despedida di

Pastoor Fick.

Sigui lesa pag. 13